

UDHËZIM
Nr. 837, datë 10.2.2017

**PËR MIRATIMIN E METODOLOGJISË PËR KRITERET DHE PROCEDURAT PËR
SHPËRNDARJEN DHE PËRDORIMIN E SUBVENCIONEVE SHETËTËRORE PËR
OFRUESIT E SHËRBIMEVE NË SEKTORIN E UJËSJELLËS-KANALIZIMEVE**

Në mbështetje të pikës 4, të nenit 102, të Kushtetutës, të germës “ç”, të nenit 28, të ligjit nr. 9000, datë 30.1.2003, “Për organizimin dhe funksionimin e Këshillit të Ministrave”, të VKM-së nr. 504, datë 6.7.2016, “Për krijimin e Agjencisë Kombëtare të Ujësjellës-Kanalizimeve”,

UDHËZOJ:

1. Zbatimin e metodologjisë “Për kriteret dhe procedurat për shpërndarjen dhe përdorimin e subvencioneve shtetërore për ofruesit e shërbimeve në sektorin e ujësjellës-kanalizimeve”, sipas lidhjes 1 bashkëlidhur këtij udhëzimi.

2. Ngarkohen për zbatimin e këtij udhëzimi Ministria e Transportit dhe Infrastrukturës, Agjencia Kombëtare e Ujësjellës-Kanalizimeve, të gjitha bashkitë, të gjithë sh.a. ujësjellës-kanalizime.

Ky udhëzim hyn në fuqi menjëherë dhe botohet në Fletoren Zyrtare.

**MINISTRI I TRANSPORTIT
DHE INFRASTRUKTURËS**
Sokol Dervishaj

METODOLOGJI

PËR KRITERET DHE PROCEDURAT PËR SHPËRNDARJEN DHE PËRDORIMIN E SUBVENCIONEVE SHTETËRORE PËR OFRUESIT E SHËRBIMEVE NË SEKTORIN E UJËSJELLËS-KANALIZIMEVE

Kjo metodologji është hartuar në zbatim të VKM-së nr. 504, datë 6.7.2016 “Për krijimin e Agjencisë Kombëtare të Ujësjellës-Kanalizimeve”, kreut III “Përgjegjësitë dhe detyrat e AKUK-së”, pika 2, germa “dh”, dhe në zbatim të udhëzimit nr. 2, datë 6.2.2012 “Për procedurat standarde të zbatimit të Buxhetit”.

Detajimi i fondit të subvencionit për çdo shoqëri aksionere të ujësjellës-kanalizimeve (sh.a. UK), dhe përdorimi i tij nga përfituesit, do të bëhet si më poshtë:

1. Subvencioni i sh.a. UK, me aksionerë bashkitë përkatëse, që ofrojnë shërbimin e furnizimit me ujë të pijshëm, të grumbullimit, largimit dhe trajtimit të ujërave të ndotura në Republikën e Shqipërisë, akordohet nga AKUK-ja.

2. Akordimi i subvencionit do të bëhet në masën e planifikuar në ligjin vjetor të buxhetit dhe të gjitha shtesave të tjera të bëra me VKM.

3. Shuma e kompensimit (subvencionit) dhe mënyra e llogaritjes së tij, bëhen në përputhje të plotë me kapitullin V “Kompensimi”, të VKM-së nr. 650, datë 16.9.2016, “Për përcaktimin e kriterëve dhe procedurës për ndihmën shtetërore në formën e kompensimit të shërbimeve me interes të përgjithshëm ekonomik dhe publik ndihmën shtetërore”.

4. Vlerësimi i nevojave për subvencione, si dhe detajimi dhe shpërndarja e subvencionit nga Agjencia Kombëtare e Ujësjellës-Kanalizimeve, do të bazohet në:

4.1 Të dhënat e raportuara nga ofruesit e shërbimeve sh.a. UK, në Njësinë e Monitorimit të AKUK-së, në përputhje me kërkesat, formatin dhe afatet e përcaktuara në manualin e programit të monitorimit dhe vlerësimit krahasues të treguesve të performancës “Benchmarking”.

4.2 Në ecurinë e përmbushjes së kriterëve të përcaktuara në kontratat e performancës, lidhur ndërmjet palëve (sipas akteve ligjore në fuqi).

Treguesit që do të merren në konsideratë për shpërndarjen e subvencionit sipas pikës (5.2) do të jenë: (uji pa të ardhura; norma e arkëtimit; raporti i mbulimit të kostos me të ardhurat nga ofrimi i shërbimeve) me anë të të cilëve llogaritet koeficienti i performancës mbi bazën e të cilit renditen shoqëritë sipas performancës, lidhur ngushtë me tregues të tjerë si pesha specifike e kostove të punës dhe energjisë elektrike në koston totale të shërbimeve, staf/1000 lidhje UK etj.

5. Subvencioni i përfituar sipas pikës 3 të kësaj metodologjie do të përdoret nga sh.a. UK

5.1 Për të përballuar mbulimin e “Kostos neto” (Diferencën = Të ardhura – Kosto totale e operim/mirëmbajtjes), për të tria shërbimet publike që ofrohen në sektor: a) Furnizim me ujë të pijshëm; b) Kanalizime; c) Trajtim e përpunim të ujërave të ndotura;

5.2 Për të nxitur përmirësimin e performancës së sh.a. UK që operojnë në sektorin e ujësjellës-kanalizimeve.

6. Skema e ndarjes së fondeve për përmbushjen e detyrimeve të përcaktuara në pikën 5, për vitin e parë pas hyrjen në fuqi të këtij udhëzimi do të jenë:

6.1 80% e fondit të përgjithshëm të subvencionit do të shkojë për përballimin e “Kostos neto” (në rastet e shoqërive me vlerë negative të saj).

6.2 20% e fondit të përgjithshëm do të përdoret nga shoqëritë që përmirësojnë performancën e tyre krahasuar me rezultatet e vitit të kaluar.

7. Përgjithësimi nga përfitimi i subvencionit sipas përcaktimeve të bëra në pikën 6.1 të kësaj

metodologjie, të gjitha shoqëritë e UK, “Kosto neto” e të cilave rezulton me vlerë 0 ose është vlerë pozitive.

8. Përjashtohen nga përfitimi i subvencioneve sipas përcaktimit të bërë në pikën 6.2 të kësaj metodologjie, shoqëritë e UK që janë brenda skemës së subvencionimit, në rastet kur:

8.1 Nuk është firmosur marrëveshja e performancës midis AKUK dhe bashkisë përkatëse;

8.2 Nuk është firmosur një kontratë performance/menaxheriale, midis Bashkisë/Asamblesë së Përgjithshme dhe Këshillit të Administrimit/Administratorit të Përgjithshëm;

8.3 Nuk kanë arritur objektivat e treguesve të performancës të cilësuar në marrëveshjen dhe kontratën përkatëse.

9. Subvencioni i akorduar nga buxheti i shtetit për shoqëritë e ujësjellës-kanalizimeve, do të përdoret sipas përcaktimeve si më poshtë:

9.1 Në rastin kur fondi i subvencionit është dhënë me destinacion përballimin e “Kostos neto”, ai do të përdoret për të paguar pagat dhe sigurimet shëndetësore e shoqërore të punonjësve, faturat e energjisë elektrike, materialeve të konsumuara dhe kimikateve.

9.2 Në rastin e përfitimit të subvencionit, për arsye të përmirësimit të performancës, shoqëria mund ta përdorë këtë fond, për të përballuar riparimet dhe mirëmbajtjet kapitale të aseteve që zakonisht mbulohen nga vlera e amortizimit, pa tejkalluar vlerën e tij në koston e vitit.

10. AKUK-ja, bazuar në vlerësimin e performancës të sh.a. UK-ve, çdo vit i propozon ministrisë përgjegjëse për infrastrukturën, metodologjinë dhe skemën që duhet të zbatohet për ndarjen e fondeve sipas përcaktimeve të bëra në pikat 6.1 dhe 6.2 të kësaj metodologjie, si dhe renditjen e shoqërive sipas performancës.

11. Ministria e Transportit dhe Infrastrukturës, e cila bën çeljen e fondit të subvencioneve për sektorin e ujësjellës-kanalizimeve dhe trajtimin e ujërave të ndotura, ushtron kontrolle periodike për të vlerësuar mënyrën e përdorimit të fondit të akorduar, për çdo ofrues shërbimi apo shoqëri që ka përfituar nga skema e subvencionimit.